

Puisi

Suraidi Sipan

Di Mana Kau Sukmaku

Di kabus tebal ini
aku mencari akan kau sukmaku
yang hilang antara gemerlap
lampa-lampa jalanan

Di manakah kau sukmaku
di puncak menara
atau di ranting cemara
atau di kesibukan jentera-jentera arus kehidupan.

Aku yang terlantar kekaburan
tergoda oleh kegelitaan malam
dan
kau terus menyembunyi
membiarkan aku sendiri dalam perjalanan ini.

Bremen, West German
Jun 79

Solat Maghrib di Masjid Petempatan Melayu Sembawang
(Masjid Kampung Wak Hassan)

Mentari lelah sepanjang hari mula mengundurkan diri
Angin menggeliat menyelusuri dedaun dan reranting pepohonan Serangga
mula mengatur simfoni untuk acara menjelang malam
jalan beraspal kulalui
sepi yang tidak bertepi.

Langkah-langkahku diintai
pepohonan tembusu, ketapang dan jejawi
berteman rerumputan dan ilalang yang menghuni
di pinggiran jalan.

Awan-gemawan di atas kepala
merangkak perlahan-lahan
sedang langit sibuk merias diri
menyambut kehadiran rembulan sang ratu malam.

Selamat datang dan salam sejahtera!
dari wajah-wajah yang menguntum senyum kepadaku.

Rumah ini telah lama mengabdi diri
sejak tangis riang suara bayi hingga
penghuninya menyepi.

Di rumah ibadah inilah terhimpun rahsia bersama Tuhan
yang tidak terungkapkan.

Aku berdiri mengatur saf yang dapat terhitung dengan jari
tegak lurus di atas sajadah usang
tunduk ke arah kiblat yang satu.

Sebentar sepi tenggelam dalam lubuk hati
ayat-ayat suci menari-nari melingkari ruang ibadah ini
menelusuri rongga-rongga dan mendakap erat tubuh ini
kalimat-kalimatnya mengalir bersama arus darah dalam nadi
kami menyatu diri dan hanyut dalam ayat-ayat suci.

Singapura
2016

**Ramadhan Berduka
Menyambut Syawal di Bumi Palestin (Gaza)**

Sayup-sayup azan berkumandang
menyapa puing-puing bangunan
memberi salam kepada bayi dan anak-anak yang pamitan
lebih awal dari impian dan harapan
yang terkubur pada timbunan himpitan beton dan kawat tajam
oleh hujanan peluru, roket dan ledakan
jelaga menyelimuti langit kosong.

Sayup-sayup azan berkumandang
berbaur raungan dan tangisan ayahanda dan ibunda tersayang.

Ya Allah Ya Rabi
Kau hadiahkan kami Ramadhan yang mulia lagi suci
Kau taburkan menggunung pengampunan, pahala dan rezeki
tetapi, alangkah nistanya kami, ketika Ramadhan-Mu dinodai
dengan kebiadaban yang tak terperi.

Lihatlah tanah ini yang mengalirkan darah dan air mata
sudah berabad-abad usianya
di bulan suci ini, terus berulang lagi
dengan peristiwa-peristiwa ngeri yang menyayat hati
Kami warga dunia hamba-Mu ini
menyaksikan keserakahan dan kezaliman yang terjadi
di Al Aqsa, Tebing Barat dan Gaza
Suara kami yang menggema di seluruh pelusuknya
tetap tidak menemukan erti,
usaha menjadi sia-sia dan mati.

Penguasa besar di muka bumi ini
dengan bongkak menghalalkan perilaku yang keji.

UN menjadi medan percaturan yang licik
mempamerkan kuasa dan mengadu-domba yang tak terdaya.

Ya Allah ya Rabbi
Pandanglah kami yang hina ini
Kau Maha Mengerti lagi Mengetahui
akan rahsia semua peritiwa ini
kurniakan kami kesabaran dan ketabahan
hapuskanlah amarah dan rasa dendam yang membakar hati
angkatlah kesengsaraan di bumi Palestin ini
anugerahi kedamaian yang hakiki.

Sayup-sayup azan berkumandang
Sayup-sayup doa kami panjatkan
Menembusi langit dan bumi-Mu Tuhan
Memuji akan kebesaran-Mu pencipta dan penguasa alam.

Bawalah kedamaian di bumi Palestin.

Singapura
1 Syawal 1443
Mei 2021

Biodata Penulis:

Suraidi Sipan

Penyair kelahiran Singapura pada tahun 1950. Beliau adalah pesara guru selepas 40 tahun berkhidmat. Kini beliau giat terlibat sebagai anggota perunding bidang bahasa dan kesusasteraan Melayu di peringkat sekolah menengah Singapura. Prolifik menghasilkan puisi dan pernah memenangi genre ini dalam Anugerah Sastera pada 1978 dan 1983. Beliau turut menulis dua novelet, iaitu *Cinta* (1977) dan *Mariam* (1977). Suraidi menyertai International Writing Programe (Iowa, USA, 1984). Beliau ikut membaca puisi sempena Hari Kebangsaan Malaysia (1988) dan Festival Seni Antarabangsa Kuala Lumpur (2015). Keterlibatannya juga dalam Singapore Writers Festival 2013 dan 2014. Pernah menjadi Penulis Tamu di Universiti Kebangsaan Singapura (NUS) pada 2016. Kini Suraidi adalah Presiden Angkatan Sasterawan '50 (2023-2025).